

# ВІДОВІСТНИК

Бокшану.

Да бсій  
єдінно  
бъдасть

Iw. 31, на.

ДУХОВНА ГАЗЕТА ДЛЯ ПОДКРУСИНОВ

Заложуйте свои вкладки до Централи або до філіялів

# **ПОДКАРПАТСКОГО РУСЬКОГО БАНКА**

**Стан вкладок повысше 18,000.000 Кч.**

В всяких финансовых и господарских дѣлах доставить Вам  
скору, точну и бесплатну пораду

**ПОДКАРПАТСКІЙ БАНК В УЖГОРОДЪ**

Своими заощаджеными гелерами при доброму опроцентованю  
капитала подпирайте свой народный

**ПОДКАРПАТСКІЙ БАНК В УЖГОРОДЪ**

Свой до свого! Истинно народна, руська и славянска институція

**ПОДКАРПАТСКІЙ БАНК В УЖГОРОДЪ**

Пересилки доляров до Америки з дозволом Банковного Уряду  
выконує

**ПОДКАРПАТСКІЙ БАНК В УЖГОРОДЪ**

Переказы до Галичини, Польщъ и до других держав Европы  
и Америки выкбнue найвыгоднѣйше

**ПОДКАРПАТСКІЙ БАНК В УЖГОРОДЪ**

Америцкѣ десеквестраціѣ, асекураціѣ и компензаціѣ за померших  
в Америцѣ переводить

**ПОДКАРПАТСКІЙ БАНК В УЖГОРОДЪ**

За вкладки (льокації) ощадностей и капитала платить наш  
**ПОДКАРПАТСКІЙ БАНК В УЖГОРОДЪ**

**5%—6%.**

Подорожну канцелярію, продаж желѣзнодорожных карточок на  
цѣлу територію Чсл. Республики и до всѣх сторон свѣта має

**ПОДКАРПАТСКІЙ БАНК В УЖГОРОДЪ**

**ПОДКАРПАТСКИЙ РУСЬКИЙ БАНК**

**В УЖГОРОДЪ, ПЛОЩА МАСАРИКА Ч. 11.**

Число 8. Ужгородъ 1. августа 1926. Рочникъ VI.

# БЛАГОВѢСТИЙ

ДУХОВНА ГАЗЕТА ДЛЯ ПОДКАРПАТСКИХЪ РУСИНОВЪ

ПРЕДПЛАТА:

на рокъ . . . 10— Кч.  
за границю . . . 20— Кч.  
до Америки . . . 1— д.  
Одно число 1 Кч.

Выходитъ разъ на мѣсяцъ

А д р е съ:

Редакція: Kapitulska ulica č. 10.  
Администрація: Монастыръ О.О.  
Василіян, Ужгородъ, Раковци 52.

ОБЯВЛЕНИЯ:

принимаются по цѣнѣ:  
за одну стор. . . . 200 Кч.  
за половину стор. . 120 Кч.  
за четверть стор. . . . 65 Кч.

## Въ имени закона и справедливости.

Приближається конецъ терпѣнїй нашего христіянскаго народа на Подк. Руси. Правительство рѣшило — по 8 лѣтной религійной борьбѣ — зробити конецъ дикому и беззаконному насильствію еретиков-схизматиковъ и выдало разпоряженіе вернути назадъ всѣ ограбленї церкви законнымъ властителямъ. Повага републики не могла дальше терпѣти, что въ серединѣ Европы въ ХХ-омъ столѣтїю батюхами зфанатизована товпа насильственно забирала и въ посьданю держала церкви и церк. маєтки гр. каѳоликовъ. Весь культурный свѣтъ дивовався, что на Подк. Руси могло стати то, что якѣсь пришелцѣ батюхи безъ жадного образованя такъ довго могли дурити народъ, причинити ему только горя, спинити его здоровый культурный розвитокъ и друтити его въ тьму невѣжства и дикости. Але дерева не ростуть до неба; наповнилася чарка несправедливости и пришовъ день справедливости и порядку. Всѣ ограбленї церкви вертаються назадъ въ руки ихъ законныхъ властителей и всѣ честнѣ горожане Републики зъ удоволенiemъ душевнымъ констатируютъ, что въ Републицѣ не вымерла еще сила закона и надъ беззаконностю запановала справедливость.

Тѣ нашъ ревнѣ и честнѣ вѣрники, котрѣ пережили правдивѣ часы переслѣдованій першихъ христіянъ, зносили всякѣ зневаги и безчести изъ стороны еретиковъ и батюховъ, мають причину днесъ на велику радость. Сколько разъ били, палили, збытковали ихъ, сколько шкоды и въ маєтку и въ чести причинили имъ, держали ихъ подъ гнетомъ, нодъ насилиствіемъ, не допушали ихъ до ихъ властныхъ церквей, прозывали, безчестили ихъ и Богъ знае якѣ тамъ еще терпѣнія завдавали имъ. Але они выдержали и ихъ вытревалость днесъ увѣнчалася успѣхомъ. Дожили тѣ часы, коли вертають имъ назадъ церкви и перестане терроръ и переслѣдованя и запанує правдива „свобода вѣры“.

И сей енергичный выступъ правительства отворило очъ и тымъ бѣднымъ людямъ, котрѣ далися звести дурницями батюховъ. Теперь могутъ видѣти тѣ збаламученѣ люде, что батюхи имъ просто брехали, коли обѣцяли имъ церкви и маєтки нашѣ; теперь могутъ удостовѣритися, что цѣлу сію религійну борьбу зробили батюхи не для блага народа, але чтобы досталися до хлѣба безъ науки, безъ роботы и безъ жадного священичого званія. Хвала Богу народови уже отворилися очъ и дальше не маєяки такъ танцовати, якъ батюхи играють. Передъ ними теперь уже ясна дорога. Мають признати, что заблудили. Се не ганьба! Туй треба зложити всякий стыдъ и соромъ и ступити на ту дорогу, зъ котрою такъ хитро звели ихъ батюхи, и котрою дорою достанутся до пережного спокою и вдоволеня. А батюхи най идутъ собѣ зновъ свинѣ пасти, кам'яня товчи, бактеровати, або най возьмуть зайду и най идутъ за границю, зводки принесла ихъ нещастна доля до насъ.

1926. рокъ.

„БЛАГОВѢСТИКЪ“

Сторона 115.



## Стойте во вѣрѣ!

### 7. Чуда.

Георгій Михайлюкъ ставитъ намъ подъ ч. 23. слѣдуюшій вопросъ: „Почему у нашей Греко-Римской Церкви не стаются чудеса послѣ разединенія зъ схизмою?“

Отвѣтъ: Мусиме ганьбитися за нашего брата Михайлюка, что онъ маючи здорову голову и не погубленое сердце посмѣвъ поставить сесь вопросъ. — Видавъ по пьяному его писавъ, а може не думавъ, что писавъ.

Если вы, солодкій Георгіе, не знаете о томъ, что сколько то чудесъ сталося въ святой каѳолической Церкви якразъ послѣ сего, якъ схизматики одорвались одъ неї и якъ нашъ предки Русины соединилися зъ здоровымъ пнемъ Христовоѣ Церкви, то будь ласка, завдайте собѣ труду и розвѣдайтесь, якъ много и якъ часто дѣются въ св. Каѳолической Церкви великѣ, дивнѣ чуда въ Лурдѣ во Франціи, або въ недалекой Марія-Повчѣ. — А хотите еще больше упознати, якъ на нашей руській земли за молитвами Преч. Дѣвы Маріи Господъ Богъ творивъ часто чуда, то зайдѣть до Жировицѣ, Почаєва, Зарваницѣ, Гошова, Кальваріѣ, Крскова, Кристинополя, Погонѣ, Улашковецъ и иншихъ мѣстъ, де знаходятся чудотворнѣ иконы Божої Матери. Колибы вы, солодкій брате, были собѣ завдали труду се упознати, то такого дурненького вопроса не былибы до насъ загнали.

А може вы и чули, або читали про сесь славнѣ зъ чудесъ мѣста, тодѣ, еще горше зъ вами. Бо у васъ хибуете розуму, але ваше сердце дуже погубленое, бо оно слѣпое и упертое и закаменѣлое, бо хотя знає правду, однакъ не

хоче еѣ приняти и противится еѣ, а се грѣхъ великий и страшный противъ св. Духа и веде до остаточного нерозкания и вѣчної загибели.


Гадкуйте, брате милый, другимъ разомъ якъ берете перо у руки и хотите писати про дѣла, котрѣ доторкають вѣры святої и спасенія, чтобысте и мудро и честно писали, а не выставляли себе на смѣхъ. Не забывайте о томъ, что дурнота и злоба выйдутъ на верхъ якъ олива, ци пакъ якъ шило изъ мѣшка. — Розумно?

### 8. Унія.

На вопросъ поставленый „Что то значить унія и почему такъ еѣ боятся схизматики“ и на подобнѣ сему далисме уже ясный отвѣтъ въ „Благовѣстнику“ за минувшій годъ въ числѣ 6 стор. 84., а еще обширнѣйшій отвѣтъ дадеме въ календари „Благовѣстника“ на рокъ 1927., въ статяхъ: „Что майстарое“? — Завдайте собѣ труду ихъ прочитати, а тогда стане вамъ ясно. Шкода мѣста ажъ два разы про се писати. — Добрѣ?

„Чому схизматики такъ боятся унії?“, то найкрасше они самѣ вамъ потрафлять отвѣтовати. Позвѣдайте ихъ самѣ, бо е ихъ еще на вашой долинѣ, або якъ хотите, напишѣть до ученого ихъ архимандрита Кабалюка, або Виталія. а въ бѣдѣ и до госп. посла Гагатка. Они вамъ „бизонь“ скажутъ, чому они боятся унії, якъ чортъ өиміяна. — Мы не сидиме въ ихъ головахъ и сердцяхъ, то напевне не можеме сказать, чимъ они руководяться. Та выдавъ причиною сего ихъ страху и ненависти до унії буде се, на что указує Іисусъ Христосъ въ Евангеліи словами: „Свѣтъ прійде въ міръ, і возвлюбіша человѣцы паче тмѣ, нѣже свѣтъ: вѣща бо йхъ дѣла злѣ. Ісѧкъ бо дѣламъ злѣ ненавідитъ свѣтъ і не приходить до свѣтъ, да не обличаєтъ дѣла єго, та ко лвака сѣть. Творѧй же Істину грядетъ до свѣтъ, да івлітъ дѣла єго, та ко ѿ Ізѣкъ сѣть содѣлану“. (Іо. 3, 19, 21). — Ци не такъ? Припозирайтесь и розмѣркуйте собѣ!

Симъ кончиме розяснованя першої части постановленыхъ намъ вопросовъ, котрѣ относилися до вѣры. Другимъ разомъ, якъ Богъ небесный допоможе, перейдсме до другої части вопросовъ, котрѣ касаються богослуженія и обрядовъ. — Найже Духъ святый, Духъ истинны, освѣчує насъ своимъ небеснымъ свѣтломъ, черезъ цѣлый нашъ животъ, чтобы мы познавали Божу обявлену правду, до неї прилѣплялися и ишли путями, якими она насъ поведе, а варовалися передъ всякимъ блудомъ и отступствомъ одъ Божого путя! — „Іазъ єсмъ свѣтъ міръ: ходій по миць не йматъ ходити во тмѣ, но йматъ свѣтъ жикотникъ!“ (Іо. 8, 12). Каже Господь.



### Швецъ знай свое ремесло, до кравеца не мѣшайся.

Розказуєся въ одной казцѣ, что осель хотѣвъ быти спѣвакомъ и гусляремъ, ракови же захотѣлося доконче стати генераломъ, но и жаба собѣ желала быти великимъ писателемъ. Та хотя и якъ ослище мучивъ гуслѣ и натягавъ свої сомарскѣ уха, спѣвакомъ и музыкантомъ не зоставъ, бо ани его лабы ни голосъ до сего не надавався. Онъ все по сомарски спѣвавъ. Рачиско такъ розумѣвся на войсковыхъ дѣлахъ, что якъ увидѣвъ ворога, всегда назадъ утѣкавъ въ калабаню. Но и жаба, поки еѣ не проковтнувъ голодный бузько, писала свої сочиненія розлѣзлими лабами, по смердячомъ багнѣ. — Ся казочка тиснется тобѣ мимоволѣ до головы, коли читаешь „Церковную Правду“, ци пакъ „схизматицкѣ брехнѣ“. — Въ послѣдніхъ числахъ (11—12) такъ много накрутили и набрехали, что ажъ дивно, якъ може оденъ чоловѣкъ не то же „православный“ батюхъ, але поганинъ, котрій має еще мало ганьбы и чести, такое кругѣйство и брехнѣ писати. Якъ злющій собака на мѣсяцъ, такъ и славнѣ сочинитель „схизматицкої правды“ лаютъ на Петровыхъ наслѣдниковъ, римскихъ отцовъ, на нашего Преосв. Владыку, на греко-каѳол. священниковъ и на всѣхъ греко-каѳоликовъ, котрѣ не хотять за ними лѣзти у схизматицко-большевицкое, поганое багно. Хотѣвъ одинъ зъ другымъ нѣбито „право“ славити, а ту заревѣвъ по сомарски (на сс, бо онъ сомаръ). Добре то каже наша пословиця что „дай дурневи перо у руки, то все дурницю напише“. Такъ и у ныхъ. Не буде зъ клоча батогъ, кажуть люде, якъ и сомаръ не буде дякомъ, ракъ генераломъ, а жаба писателемъ. Такъ и свинопасъ, бейрешъ ци бохтеръ, хотя и духовну рясу возьме на себе, не стане еще добрымъ теологомъ.

Ганьба нашимъ отступникамъ, что идуть за такими вождями. „Слѣпецъ слѣпца, ѿще водити начнетъ, оба въ гамѣ впадутъ“. Каже Господь Іисусъ. Такъ и они походили. Завели ихъ ажъ у протестантскій ярокъ. На 98. стр. пише такій рачиско: „Вся англійская (лютерская) Церковъ ужс признала православной церкви догматы, только нужно еще формальное соединеніе“. Ось видишъ шизматицка церква тамъ, де кальвинска и лютерска еретична! Розлуки во вѣрѣ тамъ не е! Радуйтесь „православніе“, что одступивши одъ Христовоѣ единовѣї Церкви тужите за еретичною калабанею. Выговорилися! Та добре се всѣмъ знати.

Схизматицкѣ батюхи не лемъ крадуть церковное добро каѳоликовъ, але хотять тоже украсти и нашихъ греко-каѳолицкихъ Святыхъ, чтобы ихъ именами прикрыти своѣ брехи. Святыхъ равноапостольныхъ Кирила и Меѳодія втягають тоже въ свое схизматицкое багно. Забывъ сомариско, который сесе писавъ, что еще и на свѣтѣ не было батька схизматицкого Фотія, якъ св. Кирил и Меѳодій проповѣдали Христову правду и у Петрового наслѣдника, римского отца, просили о благословеніе для своеї працѣ и славянскої літургії. Та сомарскѣ уха вылазять, якъ шило изъ мѣшка, хотя якъ ихъ прищурює!

Нашѣ кривославнѣ одступники шукали по всѣхъ усюдахъ для себе вождовъ (въ Празѣ знашли Саватія, въ Оломоуцѣ Горазда, залазивъ всюди и Москаль Веняминъ и Сербъ Дозитей та Серафинъ та ними не были задоволені), теперь вынайшли собѣ пастыря ажъ въ Сербіи, якогось москаля Митрофана, которого хотять покликати до Мукачева, чтобы провадивъ ихъ еще глубше у лютерску безвѣрну калабаню. Увидиме, ци якій тамъ Алексей або Виталій и на него не кине клятвы и не назве еретикомъ. Лемъ впередъ!

Звѣдуемся еще сихъ раковъ изъ „схизматицкої правды“, где они вычитали, что предсѣдателемъ Апост. Собора въ Ерусалимѣ бывъ св. Апост. Яковъ, коли Дѣянія Апостольскѣ ясно кажуть, что проводивъ на семъ соборѣ св. Петро Апостоль. (Дѣян. 15. 71). — Швецъ знай свое ремесло, до кравеџтва не мѣшайся! Кондашъ бери корбачъ у руки, а до теології не берися, бо изъ пса не буде солонина!

### Ци правда?

Нашѣ одступники неукѣ батюхи, что подъ двома-трьома мѣсяцями изъ свинопасовъ и бохтеровъ зостали перефабрикованѣ на священниковъ, намагаються прикрыти свое неуцтво и простацтво симъ, что кажуть Апостолы тоже не ходили до школы (гімназії) и не были ученѣ. — Та дуже они помиляются. Св. Павло Апостоль бывъ ученый у всѣхъ тамошнихъ наукахъ;

онъ ходивъ до школы славного ученого Жыда Гамалиила. — Св. Лука Евангелистъ бывъ лѣкаремъ, тоже посѣдавъ науку. Лѣкарского дѣла не изучився изъ свинскихъ хребтовъ. — А и всеѣ другъ Апостолы не были такъ неуки, якъ се говорять глупъ одступники. Они училися теологіѣ и Божихъ правдѣ не у чоловѣка, але у самого Іисуса Христа, вѣчное мудрости и Божоѣ правды. А училися еѣ не мѣсяць-два, але цѣлыхъ три годы. И тогды еще всього не знали, а лише да-что. Въ великий четверъ Господъ Іисусъ каже своимъ Божимъ словомъ, что всеѣ Божоѣ истины научить ихъ св. Духъ, Духъ истины, котрого обѣцюе имъ послати и котрого пославъ имъ десятого дня по своемъ Вознесенію. (Іо. 14. 26). Освѣченъ Божимъ небеснымъ свѣтломъ св. Духа сталися Апостолы наи-большими учителями Божоѣ обявленоѣ правды и одѣ ныхъ учаться небесноѣ мудрости усѣ мудрецѣ въ св. Христовой ка-ѳолической Церкви уже 19 сотокъ лѣтъ. — Говорити отже, что св. Апостолы были неуками се и дурное и безбожное! Дай намъ Боже нынѣ такихъ неуковъ якъ Петро, Павло ци Іоанъ Апо-столы! А своимъ дурнымъ балаканьемъ не прикрыто схиз-матицѣ батюхи свого неуцтва, бо оно все вылѣзе изъ нихъ, якъ шило иэъ мѣха, якъ се можъ увидѣти иэъ ихъ брехнѣ собраноѣ въ „Церковной Правдѣ“. Святѣ отцѣ Василій, Золо-тоустій, Григорій ци пакъ Атаназій або Дамаскинъ, се не были неуки, але такъ ученѣ, что цѣлый свѣтъ не може надивоватися ихъ мудрости. Отже не лукавити душою а покаятися!

### Малый вопросъ.

Якійсь рачиско изъ „Схизматицкоѣ Правды“, котрый хотѣвъ перекинутися въ ученого богослова, написавъ ось такое: „Въ папиштатской Церкви миллионы дѣтей умираютъ безъ св. Тайны миропомазанія. Правильно-ли то? Спаситель нашъ не дармо установивъ ту тайну“. На сесю мудрость звѣдуемся и мы сего ученого богослова: „Въ схизматицкой Церкви миллионы не лишь дѣтей, но и людей умираютъ безъ св. Тайны: Покаянія, Елеопомазанія, Священства и Супружества. Правильно-ли то? Спаситель нашъ не дармо установивъ сесь Тайны!“ Но дайте намъ розумного отвѣта! Еслижъ не знаете отвѣтити, то до теологии не берѣтсѧ, бо на ней вы, раки, такъ ро-зумѣтесь, якъ курица на пивѣ.

### Хитрость вождовъ схизматицкихъ.

„Р. Земля“ е въ службѣ схизматиковъ. Даколи цѣла га-зета наповнена плачемъ и рыданіемъ батюховъ противъ уніятоў. Туй нась обклеветають, туй на нась нападають, туй нась без-

Сторона 120.

„БЛАГОВѢСТИКЪ“

Рокъ 1926.

честять и туй проклинають нашихъ „поповъ уніятскихъ“. Добре! Але коли такъ бйете насъ „поповъ уніятскихъ“, та тогды чому оголошуєте въ самой той газетѣ, что:

„Каждый истинный карпаторось долженъ быть членомъ Общества имени Духновича?“

Чому передъ народомъ бйется въ груди, что вы твердѣ православиѣ а на самой той сторонѣ газеты оголошуєте тое товариство, что имя носить одного ревного гр.-каѳ., або якъ вы кажете „уніятскаго“ каноника. Чому передъ народомъ называете насъ „чорнодушными и проклятыми уніятскими попами“ а въ Р. Землѣ кличете всѣхъ карпаторосовъ до того товариства, котрого предсѣдателемъ е „уніятскій попъ“, секретарь такожъ, а меже члепами находяться и каноники и попы уніятскѣ? Не боитесь, что вашихъ истинно русскихъ карпаторосовъ „православныхъ“ сіе уніятское и поповское Общество зведе изъ путя православія? Еслибы я бывъ „православнымъ“, я бы не вѣрилъ вамъ, бо вы иншакъ говорите на селѣ, и иншакъ въ городѣ. Або може уже не вѣрють вамъ ни на селѣ, ни на городѣ, ни православиѣ, ни „уніяты“. Се е платня за вашу дволичну политику.

## Ци видѣвъ?

Громадка людей вертала процесію зъ отпуста. По дозрѣ стрѣнули двохъ легиньовъ ізъ К. Цигаретлеки въ зубахъ, калапы на головахъ. Упознати доразъ, что они изъ якоѣ школы. Процесія станула подъ крестомъ. Вѣрнѣ заспѣвали: „Кресту твоему покланяемся Владыко...“ Легинчуки зъ боку подсмѣховалися ізъ сихъ, что кланялися разпятому Спасителеви. Люде помолилися добру хвилю подъ крестомъ, тай постилися ити дальше. Позаду ишло двохъ старшихъ чоловѣковъ. Не годнѣ были додержати кроку молодшымъ. Зровналися они зъ легинями и поздоровили Божимъ словомъ: „Слава Іисусу Христу!“ „Дай Боже!“ пробормотѣвъ подъ носомъ одинъ хлопчиско. „Ага, то вы такъ потята!“ погадали собѣ старѣ газды. „Красно васъ научили вашъ безвѣрнѣ апостолы“.

Кому то вы теперь спѣвали и кланялися?“ зачепивъ ихъ одинъ легинь.

„Та якто кому? Ци не видишь? — промовили наразъ оба газды. „Тажъ Божому Сынови за насъ розпятыму!“

„А вы его видѣли?“ — звѣдалися безлично безвѣрнѣ легинчуки.

„Мудрагелъ вы, виджу, сказавъ сивый газда, — не абы якъ. Колистесь нась позвѣдали, то послухайте отвѣта. Но впередъ я и васъ дачто позвѣдаюся.

„Ци видѣли вы Прагу?“.

„Еще нѣтъ, хиба якъ пойдеме въ катуны, то увидиме“, — сказали жававо хлопцѣ.

„А видѣли вы Будапештъ?“ — натискавъ старый.

„А якоѣ намъ бѣды Будапешту?“ гойкнули легинѣ.

„Не звѣдуся я васъ — продовжавъ старый, — ци вамъ что треба, ци нѣтъ, но ци видѣли вы Будапештъ, ци нѣтъ?“

„Та нѣтъ, еще и не хочеме видѣти сего мадярского гнѣзда?“ — сказавъ большій легинъ.

„Но теперь повѣжте ми, ци Прага и Будапештъ е где на земли, ци нѣтъ? — поважно промовивъ старый.

„Правда, что е!“ отвѣтили скоро оба молодцѣ.

„Та якъ е, коли вы ихъ не видѣли?“.

„Але другъ люди видѣли, и кажуть, что на Чехахъ е якась Прага, а на Мадярахъ Будапештъ головнымъ городомъ“.

„Еще одно васъ теперь позвѣдаюся. Ци котрій изъ васъ видѣвъ президента нашоѣ славної републики, пана Масарика?“

„Нѣтъ, не видѣвъ жадень“.

„А ци панъ президентъ Масарикъ живе?“

„Певно, что живе, та най здоровъ проживе еще многая лѣта“ — сказали легинѣ.

„Але вы го невидѣли!“

„Та правда, але новинки пишуть про него“ — сказавъ молодшій паробокъ.

„Ба, ци чули вы коли за бывшого нашего царя Ференцъ Іовжефа? — звѣдався старый. „Добрый бывъ царь, дай му Боже царство небесное!“

„Чули, чули, еще малыми хлопцями. Въ школѣ висѣвъ его образъ. За него была велика война“ — сказавъ высшій легинъ.

„Та ци видѣли вы его?“

„Нѣтъ, нигда!“

„А ци онъ коли живъ туй на земли?“

„Та живъ и то чось ажъ сто лѣть“ — сказали легинѣ.

„Послухайте теперь, вы молодѣ, что я старый своимъ простымъ разумомъ вамъ скажу“ — рѣшучо сказавъ старый дѣдикъ. — „Хотя вы и не видѣли Прагу нѣ Будапешту, хотя вы не оглядали нашего, славного президента и бывшого царя Франца Іозефа, то однакъ вѣрите и говорите, что е на свѣтѣ панъ Масарикъ и Прага и Будапештъ, и что живъ колись тоже и Ференцъ Іозефъ. И вы смѣялибysя, коли бы кто вамъ сказавъ, что не е президента Масарика, Праги ци Будапешту, и что нигда не было на свѣтѣ царя Ференцъ Іозефа. Ци

такъ? Ось такъ и мы крещенъ, хотя и не мали щастя оглядати нашими очима Божого Сына, Іисуса Христа, однакъ мы твердо вѣриме и непохитно исповѣдуеме, что Господь нашъ Іисусъ Христосъ живъ тутъ на земли, и бывъ розпятый, умеръ, воскресъ изъ мертвыхъ и прїде судити живыхъ и мертвыхъ. Бо такъ нась научили Апостолы, котрѣ его видѣли, такъ написано во св. Евангеліи и такъ всегда вѣровала и учila св. Мати Церковь Христова. А вашъ вопросъ: „Ци мы видѣли Христа?“ не пливе изъ мудроѣ головы и вѣруючого сердця, але е ознакою, что вашъ головы пустъ и дурнъ, а сердця вашъ погубленъ грѣхомъ и безвѣріемъ. Ганьбѣться такое не то говорити, але и думати, бо розумнѣ люде будуть думати, что нашъ русъкъ легинъ не розумнѣ и вѣруючъ хлопцъ, але мерзъ поганцъ и дурнъ сомары, ибо у нихъ не увидишъ розума, но безуміе, дерзость и глупость. Не принесуть чести нашему руському народови такъ молодцъ, котрѣ мѣсто быти честными христіанами стануть безвѣрными сомарами. Останьте зъ Богомъ небеснымъ“, закончивъ старый. „Слава Іисусу Христу“.

„Слава на вѣки!“ отвѣтили наразъ заганьбленъ хлопчики. Прійшли они до головы по розумъ и уже нигда не важилися усмѣвати вѣрующихъ, чтобы не показати своихъ сомарскихъ безбожныхъ ухъ и сомарского розума. Видавъ не одному не зашкодилабы наука старого дѣдика!

(Кефа.)

## Ци у нась много такихъ родителей?

Читаеме въ житъєписи св. Тересы отъ дитятка Іисусъ, что еѣ праведнѣ богобойнѣ родители безустанно просили Господа Бога, чтобы Господь небесный зволивъ черезъ заступництво св. Іосифа, дати дитину, изъ котрой ставбы ся посему миссіонаръ. И вислухавъ Господь ихъ горячихъ молитвъ. Кромѣ иншихъ дѣточокъ давъ имъ св. Тересу, котра своими молитвами передъ Богомъ и святостю своего живота по нынѣшній день не перестає навертати людей до Бога. Тысячъ и тысячъ грѣшниковъ черезъ еѣ заступництво завернуло зъ грѣшноѣ дороги и помирилося зъ Богомъ небеснымъ. Счастливѣ родичѣ, котрѣ вымолили собѣ такого миссіонара! Розумѣли они добрѣ, якое великое сокровище для Бога и для людей е миссіонаръ. Отчули они горячое желаніе Божественнаго Спасителя высказанное словами: „Жатва обувь многа, дѣлагедей же малъ: молитесла обувь Г҃днн8 жатви, да йзвѣдѣтъ дѣлатели на жатвѣ свою“. (Лука 10, 2.) — А ци ты няню и мамко христіянска, не забываешь на сесь слова Христовѣ? Ци и вы, христіянскѣ родителѣ молитеся, абы Господь изъ вашихъ дѣточокъ выбравъ дакого на священника-миссіонара? Приэнайся такъ передъ

гомъ, сколько „Отче нашъ“, ци „Богородице“ ты откончивъ въ семъ намѣренію? Счастива ся дѣтина, котру Богъ покличе до працъ надъ розвоемъ Божого царства на земли, счастливъ и сесь родителъ, котрымъ Господь дастъ миссіонара апостола! — Запустѣла наша руська церковна нива. Что разъ менше роботниковъ. Высланиники сатаны корыстають изъ сего и насѣвають свого пекельного куколю, розширяють безвѣря и отводять людей одъ Бога. Тысячѣ безсмертныхъ душъ пропадае. Цѣли руськѣ села блукають якъ овечки безъ пастыря, жаждучѣ здорowego хлѣба Божого слова и чистоць водицѣ Божой благодати. — Христіянскѣ нянѣ и мамки, котрымъ Божѣ слова и добро душъ лежить на серцю, молѣться горячо до Господа жнива, абы зволивъ якъ найбольше сыновъ руського народа покликати до священичого стану и пославъ намъ добрыхъ, ревныхъ, святыхъ миссіонаровъ! Кобы то выросло ихъ изъ межи нась чѣмъ найбольше!

---

---

## Мѣсячное намѣреніе для членовъ Апостолства Молитвы:

„Чтобы Богъ заваровавъ роботничу молодежъ передъ безвѣріемъ и грѣхомъ“.

„Чія молодежь, сего будучность“ — кажуть люде. И по правдѣ такъ оно е. Кто захопить у свої руки молодежь, сей буде еѣ держати и на старшѣ лѣта. Каже бо и наша пословиця, что: „Чимъ горнецъ накипить, то и черепъ воняе“. Куда за молоду деревина нагнеся, туда и рости буде. Ось тому то иде завзятый бой о молодежъ. Господь Іисусъ хоче згromadити еї коло Свого Пресв. Сердця подъ своимъ св. Крестомъ, чтобы при Немъ знайшли правдивое свѣтло, животъ и спасеніе. Онъ бо свѣтломъ для свѣта (Іо. 8. 12). Онъ путемъ, правдою и животомъ (Іо. 14. 6). „Жаждаи, да грядѣтъ къ мнѣ й да пієтъ“ (Іо. 7. 37). Іисусъ Христосъ хоче зробити зъ нихъ добрыхъ, честныхъ, щасливыхъ людей, котрѣ отдали бы Г. Богу, что Боже, а людямъ, что людское. „Ізъ прїйдѡхъ, да животъ ймѹтъ й лише ймѹтъ“. (Лук. 12. 49).

Зато ворогъ Божій, діяволь и свѣтъ змагається заманити молодежъ подъ свой пекельный прaporъ, хоче погубити ихъ розумъ и выпачити ихъ молодечое сердце, на се чтобы нѣ Богъ не мавъ изъ нихъ славы, нѣ люде правдивого хосна. „Безъ мене не можете творитиническже“ (Іо. 15) — каже Господь. Безъ Іисуса Христа не можь быти добрымъ христіяниномъ, безъ него не можь быти нѣ честнымъ чоловѣкомъ!

Много молодежи нашоѣ губится для Бога и тратить душевный животъ передовсѣмъ по фабрикахъ, по ремесельныхъ закладахъ. Она бо попадае въ недобroe неразъ безвѣрное, нечестное товариство, и такъ пропадаютъ душою, выпачуятся, идуть на бездорожа. Колько болю завдаютъ сесѣ заблуканѣ душѣ солодкому Серцю предоброго пастыря Іисуса? ! Молѣмся горячо вѣсемъ мѣсяци, чтобы Господь Іисусъ захоронивъ всю молодежь передъ погубнымъ впливомъ безвѣря и грѣха. Гадкуйме тоже на нашу молодежь, чтобы не пускалася на путь безвѣрія и беззаконія.

## Новости

Еще все довольно великое е число тыхъ, котръ не заслали предплаты на „Благовѣстникъ“. Апелуеме на ихъ совѣсть и просиме чимъ скорше заслати всѣ дотеперъшнѣ рештанці. Коїсда честна газета жіе іэъ предплатниковъ. Мы боримеся за интересы христіянского народа слѣдовательно хр. народъ мае насъ подпоровати всяkimъ тоожливымъ способомъ. Суть и такъ, котръ ужсе 3—4 роки читають Благовѣстникъ и ни геллера не заслали на газету. Противъ сихъ мусиме порушати процесъ и ихъ имена опубликовать въ газетѣ. На рокъ 10 кор. жертвововати на таку святу цѣль, якъ оборона вѣры, то дѣйстно не много! Кто и только шкодує и мимо того принимаетъ и читає газету, той дивнѣ понятія мае о совѣсти и обовязкахъ христіянина. Благовѣстникъ въ нашей религійной борбѣ такъ успѣшно боровся, что вповнѣ заслужуе одъ коїждого свѣдомого христіянина всяку и моральну и матеріальну помочь.

— Передача церквей въ Бережской жупѣ. Схизматики и въ бережской жупѣ розсѧли зерно схизмы и побаламутили народъ зъ новою вѣрою. Такъ удалось имъ въ Лучкахъ, въ Горондѣ, въ Руськомъ, въ Черлемовѣ и въ Чаповцяхъ посадити на шию вѣрниковъ батюховъ, котрѣ Богъ знае изъ котрої стороны свѣта пришли до насъ. Якъ то у нихъ звычай, насильствіемъ забрали церковь и противъ всякого Божого и свѣтскаго

1926. рок.

„БЛАГОВѢСТИКЪ“

Сторона 125.

закона одправляли въ нихъ своѣ, Богу не милъ одправы. При томъ батюхи постоянно поддерживали надѣю въ своихъ вѣрникахъ, что церкви уже на вѣки ихъ, а гр.-каѳолики николи не достануть ихъ назадъ. Але неудовга вытверезилися ихъ вѣрники изъ сихъ порожныхъ и безосновныхъ обѣцянокъ. Минулого тыждня во всѣхъ высшеагаданыхъ сelaхъ (окремъ Вел. Лучки) появився окружный начальникъ и полиція, скликали членовъ комитета и урядово, перебрали одь нихъ ключъ церкви и передали ихъ гр. каѳоликамъ. Батюхи кричали, протестовали, гойкали, але народъ спокойно односився до справы и успокоився въ законномъ разпоряженію. Всягде тихо одбылося переданя церквей. Чому? Бо народъ уже насытився неспокойствіями батюховъ; уже доста было имъ изъ постоянныхъ религійныхъ споровъ, уже вытверезилися изъ мудростей пройдисвѣтовъ, уже желають спокой, миръ и согласіе. Уже лишь батюхи ведуть дальше религійну борьбу. Они ніякъ не годнѣ успокоитися, что не можъ буде дальше ловити въ каламутной водѣ, что не можъ буде и на дальше дурити людей. Навѣть якійсь батюхъ Коломацкій написавъ довгу статю въ „Р. Землѣ“, котра наповнена всякими брехнями и плачемъ и рыданіемъ. Але все дармо. Народъ уже дальшихъ борьбъ не хоче, уже доста было изъ неспокойствъ, народъ хоче вернутися назадъ до працѣ, до порядку, до законности а не вѣчно въ баламутѣ и въ процесахъ жити. Правительство переданьемъ церквей только половину зробило своеї задачи. Если хоче правдиву консолидацію, має одстранити всѣхъ тыхъ батюховъ изъ села, котрѣ не повинуються законнымъ разпоряженіямъ и дальше бунтують народъ противъ закона. Не народъ треба карати, але тыхъ, котрѣ за вели народъ въ сѣ бессаконнѣ дѣла. Правдивый порядокъ и миръ лишь тогды буде въ тыхъ сelaхъ, коли батюховъ примѣрно покарають и не дозволять имъ, чтобы въ сель перебывали. Просимс правительство въ семъ напрямъ поступати и тогды не буде мати только клопоты зъ нашою нещастною религійною борьбою.

— Чорнѣ душѣ. Схизматицка „Русская Земля“, новинка отступника Гагатка, котрый розбиває нашу Церковь и вносить безвѣріе, въ сегорочномъ 26-омъ числѣ на стор. 3-ой злобиться на сесе, что въ Америцѣ отбився въ юнію сего года величавый Евхаристичный Конгресь, въ котромъ взяли участъ многѣ кардиналы, епископы священники и великое число вѣрниковъ, изъ котрихъ міліоны приступило тогда до св. Причастія. Свою звѣстку про конгресь кончитъ схизматицко-безвѣрна газета словами: „Вотъ собирається чорна туча римскаго папизма! — „Православнѣ“ господа! Ци вы вѣрите, что въ Пресв. Евхаристіѣ есть притомный самъ Господь нашъ Іисусъ Христосъ? „Айно!“ — скажете, се одна изъ основныхъ догмъ право-

славноѣ церкви. Если же вы вѣрите въ сесю правду, то якъ можете злобитися позадъ сего, что вѣрнѣ на конгресѣ отдавали Божественному Спасителеви честь и славу? Ци вѣра и любовь до Евхаристійного Христа зродила у вашому сердцю сесю завѣсть и злобу. Якразъ такъ чувства зависти и діявольскоѣ злобы родилися на видъ обявовъ любови до Іисуса, але у кого, у мерзенномъ, черномъ, продайномъ сердцю зрадника Юды. Ганьбѣтсѧ, Господа, что у васъ черна Юдина душа! — Сыны католическоѣ Церкви невысказано радовалибыся, коли бы вы „православнѣ“ зобралися въ цѣли прославленя Евхаристійного Іисуса, а вашѣ „православнѣ“ душѣ злобляться за се, чго мы любиме и честуеме Божого Сына. Видите, куда запровадило васъ отступництво отъ единоѣ, святоѣ, соборноѣ (каѳолическоѣ) и апостольскоѣ Церкви Христовоѣ. До діяволскоѣ зависти и злобы!

Сеся черна душа показує тоже своѣ діавольскѣ роги и въ числѣ 27-омъ въ статѣ подъ заг.: „Папа и евреи“, де межи иншимъ пише, что „Папа римскій, его кардиналы и вся католическая церковь ненавидятъ и преслѣдуютъ всеможными способами православныхъ христіянъ“. Ци изъ замилованя до правды кинули вы, господа, сесю клевету? Ци не вѣдомо вашимъ чернымъ душамъ, сколько грошей давъ Римскій Папа на ратункову акцію въ корысть голодуючихъ „православныхъ“ въ Россіи? Справдѣ чорнѣ у васъ душѣ! Ганьба вамъ!

— Вернули уже и послѣдню церковь въ Чехіи католикамъ. Въ Чехіи самъ такъ насильствія робили ческѣ схизматики противъ церквей, якъ у насъ. Але прийшли мирнѣйшѣ часы и уряды за рядомъ одберали церкви одъ еретиковъ и передавали католикамъ. Дня 31-го мая была передана послѣдня церковь въ Михалковцяхъ. Дня 3-го юнія одправляли первое Богослуженіе, на которое запрошены были всѣ сусѣднѣ села. Симъ докончено дѣло передачи всѣхъ церквей въ Чехіи и приходить черга на нашъ церкви. Что въ Чехахъ законъ, то и туй мае быти закономъ! Не бойтесь вѣрнѣ гр. каѳолики и вы достанете назадъ свої церкви!

— Крадежъ въ церкви. Сими днями заломився въ гр.-каѳ. церковь въ селѣ Чарно (еп. Пряшевска), якійсь безбожный розбойникъ и укравъ чашу, дискос, звѣздочку, ложичку и двѣ ризы. Безбожного злодѣя поліція енергично глядає.

— Праздникъ Пресв. Сердця Іисусового въ Монастырѣ оо. Василіянъ въ Ужгородѣ одбывся сего року торжественно. Великата товпа народа пришла головно изъ Словакії. Преосв. Владыка такожъ присутній бывъ и о год. 7-ой одправивъ св. Службу Божу. Причащалося около 1000 особ. Сей церковный праздникъ изъ рока на рокъ больше вѣрниковъ притягає до монастыря ужгородского.

1926. рокъ.

„БЛАГОВѢСТИКЪ“

Сторона 127.

## Возваніе.

Жителъ села Копашньово (жупа Марм.) подъ шѣсть рочнімъ шиэматацкимъ панованіемъ дуже зхудобнѣли. Для славы Божоѣ хотѣли бы купити два новы звоны. Зато звертаються до ревныхъ христіянъ Подк. Руси, чтобы своими жертвами прибѣгали на помочь Копашаньскимъ вѣрникамъ, котрѣ въ обронѣ вѣры указали дѣйстно прекрасный примѣръ. Жертвы просиме заслати: Гр.-каѳ. Церковь. Корашна, п. Густъ.

о. Др. Луд. Миня,  
гр.-каѳ. духовникъ.

Гангуръ Иванъ,  
кураторъ.

## Отпustы.

Наданъ св. Апостольскимъ Престоломъ Монастырской Церкви въ Мукачевѣ дня 10-го юнія, ч. 19405.

### I. Отпусты совершеннѣ:

А) Въ слѣдуючѣ свята Богородичнѣ:

1. Стрѣтенія.
2. Благовѣщенія.
3. Успенія Пр. Богородицы.
4. Рождества            „
5. Покрова            „
6. Воведенія            „
7. Непорочного зачатія Пр. Богородицы.

Условія: (Св. Сповѣдь, Причастіе и молитва по намѣреніи св. Отца).

Б) Разъ на мѣсяцъ подъ звичайными условіями хоть коли для всѣхъ паломниковъ, котрѣ помоляться передъ св. Образомъ.

В) Престолъ Матери Божоѣ есть на всегда упривилеований „про живыхъ и мертвыхъ“.

### II. Отпусты частнѣ:

а) (300 дней разъ на день, если кто нащивить св. Икону Божої Матери и перѣть нею хоть яку молитву откончить).

б) (300 дней за каждый разъ, кто откончить богоубойно молитву: „Пресвятая Богородице, Заступнице мукачевская, здѣлай, чтобы всѣ соединилися во правдивой вѣрѣ“).

— —

## Оголоска.

Въ Суботу 28. августи (15 ст. ст.) въ день успенія Пресв. Богородицѣ (Велика Богородиця) одбудеться великий Отпustъ въ монастырской Церкви на Чернечої горѣ, коло Мукачева. Най св. Икона Божої Матери совокупить нась въ якъ найбльшомъ числѣ, чтобысме при Еї помочи обновилися въ христіянскомъ животѣ у стопъ НебесноЗ нашої Заступницѣ. На сей отпustъ прїде тоже, якъ и давныхъ лѣтъ, нашъ любимый Владыка, Преосв. Петро. — Сповѣдати будуть уже днемъ спередъ отпуста. — Роблятся старанія о знижку цѣнъ на машинахъ для всѣхъ паломниковъ.

„Пресвятая Богородице, Заступнице Мукачевская, здѣлай, чтобы всѣ соединилися во правдивой вѣрѣ“. (300 дній отпусту на кождый рікъ).

### Оголоска.

Изъ печатнѣ О. Василіянъ въ Ужгородѣ выйшла I. часть Проповѣдей Ц. з.: **Популарнѣ Катехитичнѣ Проповѣди** для католицкого народу. Зъ пѣмецкого переложивъ о. Др. Ярославъ Левицкій.

Книжка мѣстить въ собѣ 81 практичныхъ приступныхъ проповѣдей, про вѣру въ систематичномъ порядку. Оброблюванѣ темы у насъ дуже актуальнѣ. Вороги Божї: безвѣры и схизма воюють всѣми средствами противъ Бога и Церкви, треба кождому душпастыреви мати подъ руками арсеналь готовыхъ аргументовъ, зъ которыми будеме могти ихъ побивати. Такій готовый арсеналъ се згаданый зборникъ катехитичныхъ проповѣдей. Найже кождий душпастырь постарається о нихъ чимскорше. Цѣна 20 Кч. Заказовати можно въ Монастыри О. Василіянъ въ Ужгородѣ, ул. Раковци 52.

### Оголоска.

**Отпустовѣ молитви.** Выйшовъ друкомъ першій **Сборникъ отпустовихъ молитвъ.** — Кромѣ короткого поученія про отпustы, находятся тамъ ажъ 35. короткихъ молитвъ збогаченыхъ св. Церквою многими отпustами. Суть тамъ молитви въ честь Пресв. Тройцѣ, въ честь Г. Н. Іисуса Христа, до Преч. Дѣви, св. Іосифу обручнику, св. Ангелу Хоронителевѣ и іншѣ. — Сеся книжочка повинна знайтися въ рукахъ кождого, а особливо довжнѣ еї мати члены братства Пресв. Сердца Іисусового и Апостольства молитви. — Цѣна всего 50 філеровъ. Накладъ дуже малый. Заказовати можно въ Монастыри О. Василіянъ на Чернечої Горѣ, п. Росвигово коло Мукачева, або въ Ужгородѣ.

### Переписка редакції.

**Мих. Гелебанъ.** Въ дѣлѣ почтовыхъ непорядковъ редакція заслала донось до дирекції пошти. Дѣло буде вислѣджено и виновники покаранї.

**Н. Кощъ.** Такъ бы мавъ кождий о. духовникъ повѣдомити Благовѣстникъ о всѣхъ дѣлахъ, что случаються въ селѣ.

**Вас. Симкъ.** Вы добре робите, что збираете всякѣ доказы противъ схизматиковъ: але гдекотръ такъ низкъ, что годъ помѣстити. Папѣрь бы не выдержавъ, чте они роблять.

## КАЛЕНДАРЬ БЛАГОВѢСТНИКА

на  
1927  
рокъ

уже появився. Обнимає 11 арховъ печатанихъ, много оповѣдань и наукъ, и стоить только 5 Kč за примѣрникъ. Кто замовляє 10 примѣрниковъ, одержить 1 даромъ. Замовлення слати до Адміністрації „Благовѣстника“, Ужгородъ, Раковци ул. 51.

Выдає: Монастырь О.О. Василіянъ  
въ Ужгородѣ.

Отвѣтчательный редакторъ:  
Емиліянъ Бокшай.

Книгопечатня О.О. Василіянъ въ Ужгородѣ. Раковція ул. (Монастырь).



„Свой до своего!“

# „АКОРДЪ“

ПЕРША РУСЬКА ФАБРИКА  
ЗВОНОВЪ ВЪ УЖГОРОДЪ

Найлѣпшѣ звоны править перша  
руська ліярня звоновъ „АКОРДЪ“.  
Капиталъ создали сами наши люде.  
Она заряджена по найновѣйшой  
техницѣ и ведена перворядными  
фаховцями. Мѣстности фабрики на-  
ходяться около желѣзнодорожнѣ  
станціи въ Ужгородѣ. Тамъ посто-  
янно выставленъ образцовъ звоны.  
! Найлѣпшій благородный металъ.!

Спеціальна марка „Акордъ“ „А“ и „С“ звоны. 10-рочна гарантія.

Замовленя просимо адрессовати:

**„АКОРДЪ“, ліярня звоновъ въ Ужгородѣ.**

Канцелларія: Ужгородъ, Капитульна улиця ч. 11.

Замовленя можъ передати и въ Подкарпатскомъ Банку.

**РУСИНЫ!**

Не идѣть до чу-  
жихъ, а подпирай-  
те свої руськѣ ин-  
ституції

**СЛАВЯНЕ!**

Першимъ рускимъ ассекураційнымъ товариствомъ есть

# „БЕСКИДЪ“

акційное ассекураційное товариство — Ужгородъ.

Принимає ассекурацію хижъ и всѣхъ движимостей  
и недвижимостей противъ огня, противъ вломовъ,  
принимає ассекурацію на житѣе, пензій и пр.

**на дуже выгодныхъ уловіяхъ.**

Ассекуруйте только у „БЕСКИДЪ“!

**СВОЙ ДО СВОГО!**

Глядаеме добрыхъ агентовъ.

Вже выйшовъ изъ печати  
**МОЛИТВЕНИКЪ**  
для греко-каѳолицкого  
◎ руского народа ◎  
составленный о. П. Котовичомъ.

Сей прекрасный, богатый змѣстомъ молитвенникъ мае 507 страницъ друку, шитый руками, оправленый въ полотно  
—стоить лишь 7 Кч.—

Замовляти на адресу: Печатня ОО. Василіянъ въ Ужгородѣ.

**О Г О Л О Ш Е Н Ь Е !**  
Уже появився первый новый  
— КАЛЕНДАРЬ —  
„БЛАГОВѢСТИКА“  
НА 1927. РОКЪ.

Кромъ мѣсяцослова подає онъ, яка буде на каждый тиждень хвиля, сходъ и западъ сонця и мѣсяця. Въ части литературной на каждый мѣсяцъ зъ окрема дуже краснѣ науки, оповѣданя, стихи и смѣховинки. Каждый старый и молодый, родичъ и дѣти, супруги и нежонатѣ, худобнѣ и богатѣ знайдуть у нѣмъ практичнѣ поученія и хосновиту розривку. Суть тамъ прекраснѣ оповѣданя сучаснѣ и давнѣ изъ живота Подк. Русиновъ. Знайдешь у нѣмъ тоже вказовки и способы, якъ боротися изъ баламутами, что каламутять вѣру и изводять людий. На каждый мѣсяцъ є тамъ умѣщенѣ краснѣ образы. Взявши его до рукъ, не можъ его лишити, доки не прочитаешь до конца. До каждой христіянскої хижѣ повиненъ зайти сесь перший **календарь Благовѣстника**, чтобы цѣлый годъ благовѣсити всѣмъ прекраснѣ, хосеннѣ науки. Никто не пожалуе, кто его собѣ закаже Цѣна дуже низонька, бо лише **5 Кч.** Заказовати (бештеловати) чимъ скорше, бо накладъ невеликій и готово нестати. Скажи се и другими. Адресовати до **Монастыря ОО. Василіянъ въ Ужгородѣ**, ул. Раковци 52. — Можна купити въ **печатнѣ** ОО. Василіянъ въ Ужгородѣ и на **одпустахъ** въ Мукачевѣ, Имстичовѣ и Боронявѣ.